


www.diarioaruba.com
The way business moves!
DIARIO
Online
 E Matutino di Aruba

Aruba a drenta temporada di buya politico

Ayera varios hende a puntrami kico mi ta pensa di e situacion actual riba nos isla.

Mi a bisa varios di nan cu **"Aruba ta "terminal" caba cu e malesa politica, y a cuminza caba e bom di e buraco caba"**.

Si mira kico a wordo publico ultimo dianan tanto den corantnan, scucha na emisoranan y mira na television, por ripara cu ta masha buya tin, y cu tur e buya ey ta wordo haci bao di capa politico y usando **"saco di pueblo"** como e **"grito emocional"**, y e grito **"comercio ta ser perhudica"** como e grito di menaza y puñal.

Conferencia di prensa **"bashi"** ta wordo teni djis pa habri personalmente contra opositornan, cu un politico tras di otro na palabra, djis pa papia, sin trece nada nobo dilanti, sin ningun noticia den nan declaracionnan, cu excepcion di critica opositornan, bay personal contra otro, pa asina kere cu nan ta traha riba sentimento di pueblo.

NOS TA HAYA HUELGA GENERAL

Ta ki dia nos ta haya huelga general?

Un politico ta core bay radio merdia y bisa cu posiblemente e gremionan y sindicatonan ta bin cu un huelga general.

E tabata sa bon, pasobra for di den comercio, gremionan y sindicatonan na su favor, el a ricibi e **tip** di antemano.

E no a papia di huelga general, el a papia di **POSIBEL** huelga general.

Anochi e gremionan a tene conferencia di prensa y a bisa cu e unico opcion cu nan ta mira ta **POSIBLEMENTE** un huelga general.

Nan no ta bisa **"Nos ta bay den huelga general"** y nan no ta menciona **DIA y ORA** cu ta bay den huelga general, pasobra **"Posiblemente"** ta e palabra magico, tras di cual por sconde.

Esaki djis pa spanta gobernantenan y spanta e pueblo, nada mas!! Kico e posibel accionnan ta?

"Por cuminza cu ponemento di bandera preto na auto".

Tur hende sa cu por hasta tapa tur auto cu paña preto, e accion aki lo no tin **NINGUN** efecto y nan sa esaki bon tambe.

Ta kende ta spanta cu e accion aki, kizas solamente **"Spirito di Burundungo"**.

Y nan a sigui bisa cu **"Lo extremo lo ta un paro general."**

HOERAAaaaa!!!!

Awor Aruba ta bay imita Venezuela cu comercio, industria gremionan, sindicatonan y partidonan di oposicion den accion contra (ministro) President..

Huelga general durante e dianan aki y prome cu fin di aña?

Lubida!!!

Ta ki tempo a tende cu Comercio di Aruba lo perhudica su entrada di Pasco y Aña Nobo?

Mi kier sa si AHATA tambe ta tras di e **"posibel"** huelga general cu lo perhudica comercio y tambe turismo di Aruba.

Esaki pasobra ora di cualquier cos cu por ta negativo, comercio semper a sconde tras di **"turismo"**, **"nos pilar"**.

A yega di wordo bisa cu Comercio kier sinta den stoel di gobernantenan.

Semper nan a nenga, pero si mira kico ta pasando riba Aruba cu delaster un decision di gobierno mester wordo trata hunto cu comercio y gremionan, anto no mester di eleccionnan mas tampoco, principalmente si oposicionnan semper ta para **anda** di comercio contra gobierno, mescos cu cierto sindicatonan cu ora ta combini, nan ta cu comercio y ora cu no ta combini, nan ta caba cu comercio.

PALABRANAN BASHI DJIS PA PAPIA

Ayera un partido di oposicion a tene un conferencia di prensa.

Nada di noticia, nada nobo no a bin dilanti.

Tabata un conferencia pa tene e partido su nomber den publicidad durante e **"dianan di critica y hinca palo bao di e candela cu nos ta aden"**.

Cualquier cos publica contra nan, ta cla pa nan bira e palabranan den tur sorto di forma pa laga nan voz resona.

Ta menciona cantidad di cifra y ningun di nan ta cuadra cu cifranan real, pero mester menciona cifra y exagera riba esaki pa e pueblo kere.

Otro ta grita cu gobierno a aproba un ley cu gobierno no sa kico gobierno a aproba.

Pero e no ta splica kico a wordo aproba y pakico gobierno no sa kico gobierno a aproba.

Tur hende sa cu lo bin medida.

Ainda no a bisa kico exactamente esakinan ta y con nan lo afecta tur hende..

Sabiendo cu tur fin di aña ta anuncia medidanan, mester haci uso di e situacion actual di mal gobernacion, pa haci cos peor pa gobierno den bista di votadornan.

Otro aña campaña ta drenta su fase final no?

Otro ta papia solamente pa critica cierto ministro, trece cosnan di pasado dilanti, bay personal den bida di ministro, pasobra no tin nada nobo pa papia ariba.

Otro ta tira den laira kende ta goberna y kende no, pero no ta splica pakico esun ta goberna y e otro no por goberna pasobra ta otro ta manda riba dje.

Esakinan ta wega di mucha chiquito, no di parlamentarionan, no di politiconan cu nos kier respeta como politico.

Nan ta dañá pa nan mes mas cu nan ta drecha.

AWOR ATA ASUNTO DI AZV

Awe ta tende un partido ta grita contra e cambianan den ley di AZV. Mas o menos 10 aña pasa a cuminza papia di AZV.

A dura algun aña cu tur critica tabata tin riba henter e asunto di AZV y su introduccion.

Un partido cu a goberna tanto aña largo a traha mes tanto aña riba introduccion di AZV cu tur su irregularidadnan, fayonan etc.

A yuda pasa e ley aki pa drenta na vigor 2001, pero cu **"arma di destruccion masal"** tras di dje den parlamento.

E fayonan a keda presenta su mes dia pa dia, for di e prome dia..

E gremionan cu 8 aña pasa pa te 3 aña pasa mester **"a tene accion di bandera preto"**, tambe **"posibel huelga general"** no a haci nada.

Ultimo simannan tur a grita kico a bay malo, kico mester drecha, con mester drecha, etc., cosnan cu 8 pa 10 aña pasa mester a wordo haci caba.

Mester a entrega un ley corecto sin fayon den dje, pero ningun hende a bisa un man of grita **"huelga general"** **"bandera preto"**.

Ainda awor cu a pasa e ley cu tur su fayonan y buraconan, politiqueria a keda wordo hunga di parti di gobierno.

"Pasobra esnan anterior no a....., nos si lo..... sin importa kico pueblo bisa of sufri."

Esaki ta e mentalidad politico di nos isla.

"Pasobra gobierno di tal partido a haci tal, nos lo no haci tal. Nos lo haci tal, na nos manera."

E gobierno actual sa cu e pensamiento rond di Aruba ta cu nan a resulta completamente contrario di loke pueblo a spera di nan prome cu eleccion.

Nan a resulta mescos cu e gobierno cu nan mes a sinta critica siete aña largo.

Tur cos cu nan a critica nan a keda haci mescos, pesey mes ta ser papia caba cu e gobierno aki lo no bolbe, y esey lo ta nan mes falta. Nan a haya chance di drecha, y no a drecha, pero a sigui dañá.

E partido mas grandi den oposicion ta grita awe, critica awe, pero si mira bon, nan ta grita contra e mes cosnan cu nan tambe a haci of a keda sin haci, y ta kere cu nos mester kere tur esaki tambe.

Aruba no ta **"verziekt politicamente"**. Aruba ta **"terminal ziek"** politicamente, y e culpa ta cerca kende?

E culpa ta cerca nos mes cu a guli, sigui guli y guli mas y lo sigui guli, pasobra **"nos a bira ciego politicamente y no ta mira kico nos ta guli"**.

Juby Naar.